

Alþingi
Erindi nr. P 140/818
komudagur 10. 11. 2011

From: Bjarni Gunnarsson
Sent: 10. nóvember 2011 16:10
To: 'stjornskipun@althingi.is'
Subject: Ný stjórnarskrá Íslands, breytingatillaga

Nafn mitt er Bjarni Gunnarsson og er ég með lögheimili að Kristnibraut 33, 113 Rvk. Kennitala mín er 250748-4699.

Ég sendi hér að grunni til tvær breytingatillögur við tillögu Stjórnlagaráðs um nýja Stjórnarskrá Íslands.

Fyrri breytingatillagan snýr að 65. og 66. greinum (hér meðfylgjandi) um málskotsréttinn. Tíu % kjósenda var mikið þegar þurfti að safna saman skriflegum undirskriftum kjósenda. Nú þegar kjósendur eru orðnir vanir að tjá sig um hvað sem er t.d. á Facebook (Fasbók !) og geta kosið heima á sinni tölvu um hvað sem er, þá er það að verða lítið mál að safna saman „undirskriftum“ 10 % kjósenda. Ég sé það fyrir mér að það rigni yfir Alþingi óskum um þjóðaratkvæðisgreiðslur um hin ýmsu mál og væntanlega koma fram tillögur og gagnatillögur sem geta flækt málin. Sem dæmi nefni ég að tillaga um að hækka ökuskráteinisaldurinn í 20 ár fengi samþykki 10% kjósenda. Í framhaldi þess gæti önnur tillaga þess efnis að ökuskráteinisaldurinn verði 17 ár fengið samþykki 11% kjósenda – og hvað gera menn þá. Ísland úr Nató, Ísland í Nató o.s.v.frv.

Tillaga mín er því sú að í stað 10% kjósenda í greinum 65 og 66 komi 25% kjósenda til að geta krafist þjóðaratkvæðis um lög og til að geta lagt fram frumvarp á Alþingi.

Þá legg ég til að nefndir „Tveir af hundraði“ fremst í gr. 66 verði allavega „Flmm af hundraði“

Seinni breytingatillaga mín snýr að gr. 90 hér neðar. Þar er fjallað um kjör forsætisráðherra og geri ég tillögu um að breyta eftirfarandi setningu : **Sá er flest atkvæði hlýtur er rétt kjörinn forsætisráðherra.** Þarna sé ég fyrir mér óþarfa atburðarrás, þ.e. að kosning fer fram og á þessu stigi er líklegt að frambjóðandi stærsta flokksins fái FLEST atkvæði og verði rétt kjörinn forsætisráðherra. Allar líkur væru svo á því að hann væri felldur daginn eftir með meirihluta þingsins. Ég legg til að þessi setning verði eftirfarandi : Ef einhver í framboði hlýtur meirihluta greiddra atkvæða, er hann rétt kjörinn forsætisráðherra. Þessa setningu hef ég sett inn í gr. 90 hér fyrir neðan. Með gr. 90 þannig orðaða er opnað fyrir þann möguleika að verið sé að mynda minnihlutastjórn með samþykki þingsins.

Læt hér staðar numið um mínar breytingatillögur við framlagða tillögu Stjórnlagaráðs um nýja Stjórnarskrá Íslands.

Virðingarfyllst, Bjarni Gunnarsson.

65. gr.

Málskot til þjóðarinnar.

Tíu af hundraði kjósenda geta krafist þjóðaratkvæðis um lög sem Alþingi hefur samþykkt. Kröfuna ber að leggja fram innan þriggja mánaða frá samþykkt laganna. Lögin falla úr gildi ef kjósendur hafna þeim, en annars halda þau gildi sínu. Alþingi getur þó ákveðið að fella lögin úr gildi áður en til þjóðaratkvæðis kemur.

Þjóðaratkvæðagreiðslan skal fara fram innan árs frá því að krafa kjósenda var lögð fram.

66. gr.

Þingmál að frumkvæði kjósenda.

Tveir af hundraði kjósenda geta lagt fram þingmál á Alþingi.

Tíu af hundraði kjósenda geta lagt frumvarp til laga fyrir Alþingi. Alþingi getur lagt fram gagntillögu í formi annars frumvarps. Hafi frumvarp kjósenda ekki verið dregið til baka skal bera það undir þjóðaratkvæði, svo og frumvarp Alþingis komi það fram. Alþingi getur ákveðið að þjóðaratkvæðagreiðslan skuli vera bindandi.

Atkvæðagreiðsla um frumvarp að tillögu kjósenda skal fara fram innan tveggja ára frá því málið hefur verið afhent Alþingi.

90. gr.

Stjórnarmyndun.

Alþingi kys forsætisráðherra.

Eftir að hafa ráðfært sig við þingflokka og þingmenn gerir forseti Íslands tillögu til þingsins um forsætisráðherra. Er hann rétt kjörinn ef meirihluti þingmanna samþykkir tillögunu. Að öðrum kosti gerir forseti Íslands nýja tillögu með sama hætti. Verði sú tillaga ekki samþykkt fer fram kosning í þinginu milli þeirra sem fram eru boðnir af þingmönnum, þingflokkum eða forseta Íslands. Ef einhver í framboði hlýtur meirihluta greiddra atkvæða, er hann rétt kjörinn forsætisráðherra.

Hafi forsætisráðherra ekki verið kjörinn innan tíu vikna skal Alþingi rofið og boðað til nýrra kosninga.

Forsætisráðherra ákveður skipan ráðuneyta og tölu ráðherra og skiptir störfum með þeim, en ráðherrar skulu ekki vera fleiri en tíu.

Forseti Íslands skipar forsætisráðherra í embætti. Forseti veitir forsætisráðherra lausn frá embætti eftir alþingiskosningar, ef vantraust er samþykkt á hann á Alþingi, eða ef ráðherrann óskar þess. Forsætisráðherra skipar aðra ráðherra og veitir þeim lausn.

Ráðherrar undirrita eiðstaf að stjórnarskránni þegar þeir taka við embætti.